

>> 永遠懷念228大屠殺無辜受難者，勿再發生！  
(王昭文·攝影)

# 228大屠殺現場 ê 六歲囡仔

當時我才六歲，老母緊緊 kā 我 chang leh，腳才踏入去門內 niá，  
阮就聽 tióh 機關槍 ê 槍子，飛過阮 ê 頭殼頂。

➔ 吳照雄 | 旅美退休教授

## 台灣歷史 ê 烏暗日

台灣歷史中上烏暗 ê 日，就是1947年2月28日。Tī 60外年前 hit 工，因為中國政府 ê 腐敗，搶奪百姓 ê 財產 kap 藐視台灣人，古意 ê 台灣人忍受 bōe tiâu，起來反抗。蔣介石因此派陸軍第21師來台灣 beh 鎮壓暴動 kap 大事清鄉。中國兵 tī 基隆港 chiū<sup>1</sup> 陸了後，就開始用機關槍掃射 thài 人。對基隆開始向台北進行，一路掃射，用槍尾刀 tū，用槍 phah，koh 搶 koh 奪，獸性大發作，進行清鄉大屠殺。按基隆，經過台北、桃園、新竹、台灣中南部，koh kap 高雄大屠夫彭孟緝 ê 軍隊聯合，掃到

台灣尾。這是人類歷史中，清鄉大屠殺上惡毒 --ê。照估計台灣人有四萬人 hō 中國兵 thài 死。當時真 chōe 社會賢達 ê 人士攏 hông liáh 去槍殺，台灣知識份子 ê 精英一瞬間攏受消滅。

按 hit 陣開始烏暗就降臨佇台灣，台灣人受獨裁者蔣介石恐怖政治管理足足有四十年久。警備總部控制台灣人 ê 生死。台灣人佇伊 ê 本土變成二等公民。任何有關「台灣」ê 事物攏受壓制。算 boē 了 ê 囡仔學生因為佇學校講母語台灣話就受罰，我 mā 是按呢受罰--過。

上諷刺--ê 是，蔣介石 ê 國民黨管理台灣根本是無合法--ê。舊金山和約——這是49個同盟國（包括美國在內）kap 日本佇1951年9

月8日簽約--ê——根本 tiòh 無將管理權交 hō 中國。條約 ê 第 2 條 b 款按呢寫：「日本國放棄台灣及澎湖列島的一切權利，權原，及請求權。」劃一個句點，這句就按呢結束。這個條款無寫講台灣 ê 主權受交 hō 啥物國家。中華人民共和國 kap 中華民國攏無受付交託。根據聯合國憲章內底 ê 人民自決權 ê 宣言，台灣 ê 主權只有台灣人民家已決定 ê 權利。

### 大屠殺中一個六歲囚仔生還者ê見證

這是佇台北市3月14日 ê 時。當時我才六歲，teh 讀幼稚園。我 ê 老母 kap 我去台北 ê 艋舺 hiah<sup>n</sup> 一領棉被 tng--來。佇 tng 去厝 ê 路中，看 tiòh 一陣人圍 tī 北門口。阮猶佇外圍 ê 時，tú tiòh 一位媽媽 ê 老朋友，伊 tòà 佇附近 ê 所在。我阿母就問--伊，hit 陣人 teh 看啥貨，伊講佇 hia 中國兵仔 teh 槍殺--人喔！Lín mài 去 hia khah 好喔！我老母才 teh 想講，ta<sup>n</sup>，beh 按怎 tng 去厝 khah 好 ê 時，忽然間 hit 大陣人逐家青狂走四散，有 ê chông，有 ê 跋。阮 hit 時才知影，tòe 佇 hit 陣人後壁是十台大卡車，頂面安機關槍，中國兵仔沿路 teh 向群眾掃射！我老母緊緊 kā 我 chang--leh，兩個就 pià<sup>n</sup> 入去朋友 ê 厝，腳才踏入去門內 niá，阮就聽 tiòh 機關槍 ê 槍子，飛過阮 ê 頭殼頂，彈 tiòh 厝 hiā 叮-叮-叮 ê 聲。

阮 bih 佇厝內大約有15分鐘久。聽--起--來外面若親像已經平靜--ā，阮阿母就想 beh khah 緊來 tng。伊想講 ta<sup>n</sup> 經過北門無安全，阮就 pha 一大 lìn，sèh 過淡水河水門 hit 旁 tng--去。阮 kiá<sup>n</sup> chiū<sup>n</sup> 街路才看 tiòh 上淒慘 ê 景致。逐四

界攏是身屍，遍路攏是血。我看 tiòh 一個青年人，穿 se-bí-lòh koh 結 ne-kut-tái，倒佇路邊，血猶 koh 按額 kún teh bok-bok-bùn，規條 ne-kut-tái 攏 bak tiòh 血。佇我出社會了後，我攏無啥愛結 ne-kut-tái，因為見攏 teh 結 ê 時，我就會想 tiòh hit 個少年家仔，額 kún 血水猶 koh teh bok-bok-bùn。當1989年6月初4日我看 tiòh 電視新聞報導中國兵佇北京天安門 teh 大屠殺 ê 時，hit 幕恐怖 ê 情景 koh 再出現佇我 ê 目瞞前，若親像 koh 做一擺恐怖 ê 惡夢。

### 永遠懷念228大屠殺 ê 無辜受難者

每一擺我回憶 tiòh 228 大屠殺，我 lú 感覺我 ê 老母事實上生我兩擺，一擺佇我出世，第二擺佇我六歲 ê 時。我 lú 想 tiòh 這項代誌，我 lú 感覺愛好好仔有意義來活這第二擺 ê 機會，借--來 ê 性命。

我所目擊 ê 大屠殺現場是佇 chit-má 叫做「中華路」hit 條路。我希望這條路 mài 改名，thang 好記 tiâu 中國兵 ê 殘忍無人性。Hit 當時，美國 ê 領事館離現場無 lōa 遠，美國副領事 George Kerr 有親目看--tiòh，伊了後出版一本冊，叫做 Formosa Betrayed（被出賣 ê 福爾摩沙）。這本冊實在有 tah tiòh 每一個台灣人 ê 心肝頭。伊佇踏話頭按呢寫：「送 hō 我 ê 福爾摩沙朋友……紀念1947年 ê 三月事件」。

最後，佇咱 teh 紀念228大屠殺 ê 受難者，我愛用天主教教皇若望保祿二世佇日本廣島 ê 和平紀念博物館 ê 來賓紀念冊所寫--ê 來做紀念：

「永遠無 koh 再發生！」🌍